

Script of Morning Gojri News Bulletin 17 August 2024 at 1015Hrs

مارننگ گو جری نیوز بلیٹن مورخہ 17 اگست 2024

یوہ آکا شوانی جموں ہے باغ علی طاہرتیں خبر سنو۔

JK Elections

جموں کشمیر مانہہ آئندہ ستمبر مہینہ غی 18 تا ریخ تیں 3 مرحلاں مانہہ چناؤ کرایا جائیں گا۔ جد کہ ہر یانہ مانہہ اک ہی مرحلہ مانہہ اکتوبر مہینہ غی پہلی تا ریخ نانہہ چناؤ کرایا جان غو اعلان کیو گیو ہے۔ ان اسمبلی چناواں غی گنتی جموں کشمیر تے ہریانہ مانہہ اک ہی روز یعنی 4 اکتوبر نانہہ کیجا نیگی۔ واضع رہ جے جموں کشمیر تے ہر یانہ مانہہ گل 90/90 اسمبلی سیٹ ہیں، گذشتہ کل چیف الیکشن کمشنر راجیو کمار نے جموں کشمیر تے ہر یانہ مانہہ چناؤ کرایا جان با رے نویں دہلی مانہہ اک پر یس کا نفرنس غے دوران اعلان کیو۔ اس اعلان غے نال ہی مثالی ضابطہ اخلاق وی فوری طور ور نافذ العمل ہو گیو ہے۔ انہاں نے ان اسمبلی چناواں گو اعلان کرتاں واں دسیو جے جموں کشمیر مانہہ چناؤ ستمبر مہینہ غی 18 تے 25 تا ریخ نانہہ تے پھر اکتوبر غی پہلی تا ریخ نانہہ 3 مرحلاں مانہہ کرایا جائیں گا۔ انہاں نے دسیو جے جموں کشمیر یوٹی غا 87 لکھ تیں متا ووٹر اسمبلی غا 90 ممبراں غی قسمت غو فیصلو کریں گا۔ انہاں نے مزید دسیو جے یوٹی مانہہ گل 11 ہزار 8 سو پولینگ مرکز قائم کیا جائیں گا۔

Election Schedule

جموں کشمیر مانہہ اسمبلی انتخابات 3 مرحلاں مانہہ کرایا جائیں گا۔ یوہ چناؤ عمل اس مہینہ تیں شروع ہو غے اکتوبر مہینہ غی چار تا ریخ نانہہ ووٹاں غی گنتی سنگ اختتام پزیر ہوجائیگو۔ جموں کشمیر غی گل 90 اسمبلی سیٹاں ور چناؤ منعقد ویں گا۔ 18 ستمبر نانہہ پہلا مرحلہ غا چناؤ ضلع پلوامہ، اننت ناگ، شوپیان، کلگام، رام بن، کشتواڑ تے ڈوڈہ غی گل 24 سیٹاں ور کرایا جائیں گا۔ اُس غے بعد دوجا مرحلہ غا چناؤ گل 26 سیٹاں ور ضلع گاندربل، سرینگر، بڈگام، پونچھ، راجوری تے ریا سی مانہہ ستمبر مہینہ غی 25 تا ریخ نانہہ منعقد کرایا جائیں گا۔ تیجا تے آخری مرحلہ غا اسمبلی چناؤ اکتوبر مہینہ غی پہلی تا ریخ نانہہ ضلع بانڈی پورہ، کپواڑہ، بارہمولہ، ادھم پور، جموں، سانبہ تے کٹھوعہ غی گل 40 سیٹاں ور منعقد کرایا جان غو اعلان کیو گیو ہے۔

Political Reaction

نیشنل کانفرنس بی جے پی، پی ڈی پی، کانگریس، اپنی پارٹی، ڈی پی اے پی تے سی پی آئی ایم سمیت تمام سیا سی جماعتاں تے عام لوکاں نے چناؤ کمیشن غی طرفوں جموں کشمیر اسمبلی غا چناؤ کرایا جان غو خیر مقدم کیو ہے۔ مرکزی وزیر داخلہ امت شاہ نے وی جموں کشمیر مانہہ چناؤ کرایا جان با رے چناؤ کمیشن غا اعلان غو سواگت کیو ہے۔ سماجی میڈیا غی اک پوسٹ مانہہ انہاں نے کہیو جے اسمبلی چناواں غا انعقاد سنگ جمہوریت غی جڑ مزید مضبوط ویں گی۔ تے اس نال یوٹی مانہہ ترقی غو اک نوو دور شروع ویگو۔ انہاں نے جموں کشمیر غی عوام ور زور پایو ہے جے وے ان چناواں مانہہ سرگرمی سنگ شرکت کریں تے پہاری تعداد مانہہ ووٹ پا غے ایسی سرکار قائم کریں جہیڑی یوٹی مانہہ امن غا قیام، ترقی تے نوجواناں غا روشن مستقبل نانہہ یقینی بنا سکے۔ جموں کشمیر کانگریس غا صدر نے وی چناواں غا اعلان غو خیر مقدم کرتاں واں امید ظاہر کی ہے جے ان غی جماعت ان

چناواں مانہہ واحد بڑی جماعت غا طور ور اُبھر غے باندے آوے گی۔ نیشنل کا نفرنس غا صدر ڈاکٹر فاروق عبداللہ نے وی چناواں غو خیرمقدم کرتاں واں امید ظاہر کی ہے کہ بھارتی چناؤ کمیشن یہ چناؤ منصفانہ تے غیرجانبدارانہ طور ور کرایا جان نانہہ یقینی بناوے گو۔ تانجے تمام سیا سی جماعتاں نانہہ بروبر موقعو مُیسر آسکے۔ پی ڈی پی لیڈر التجا مُفتی نے اک پریس کا نفرنس مانہہ کہیو ہے جے اسمبلی چناؤ شفاف تے منصفانہ طور ور منعقد کیا جانا چاہیے۔ سی پی آئی ایم غا لیڈر محمد یوسف تاریگامی غو کہنو ہے جے چناواں غا اعلان سنگ یوٹی غی عوام مانہہ خوشی محسوس کیجا رہی ہے۔ ڈی پی اے پی غا چیرمین غلام نبی آزاد نے سرکار تے چناؤ کمیشن غو اسمبلی چناواں غا اعلان ور شکریو ادا کیو۔

Congress

اسمبلی چناواں گا اعلان کیا جان غے نال ہی کا نگرینس پارٹی نے جماعت غا سینئر لیڈر طارق حمید قراء نانہہ جموں کشمیر پردیش کا نگرینس کمیٹی غو صدر مقرر کیو ہے۔ وے وقار رسول وانی غی جگہ لیں گا۔ اپنا اک بیان مانہہ کا نگرینس کا جنرل سیکریٹری کے سی وینو گوپال نے جانکا ری دیتاں واں دسیو ہے جے سینئر لیڈر تارا چند تے رمن بھلے نانہہ جے کے پی سی سی غا کاگذار صدر غا طور ور مقرر کیو گیو ہے۔

IMA Strike

انڈین میڈیکل ایسو سی ایشن نے مغربی بنگال غا آر جی کار میڈیکل کالج ہسپتال کولکتہ مانہہ اک خاتون ڈاکٹر سنگ عصمت دری تے قتل غا واقع غے خلاف احتجاج غا طور ور قومی سطح ور 24 گھنٹاں غی بند کال غو اعلان کیو ہے۔ آئی ایم اے غی طرفوں اج سویرے 6 بجا تیں اس احتجاج غا شروع ہون سنگ تمام غیر ہنگامہ خدمات تے او پی ڈی خدمات 24 گھنٹاں توڑی احتجاج بند رکھن گو سلسلو شروع کر دتو ہے۔ تنظیم اس واقع مانہہ قتل ہون آلی خاتون ڈاکٹر نانہہ انصاف دین تے صحت کا رکنان نانہہ خاطر خواہ حفاظتی سہولت مہیا کران غو مطالبو کر رہی ہے۔ اس کال غے بعد مزید سرکار تے نجی طبی اداراں غا ملازم تے کا رکن احتجاج مانہہ شرکت کر رہیا ہیں۔ اسے دوران مرکزی وزارت صحت نے ہدایت کی ہے جے اس ادارہ غا سربراہ واقع غا 6 گھنٹاں غے اندر اندر واقع غی پا داش مانہہ ایف آئی آر درج کرن غا ذمہ دار ہیں۔

JKP Anti Terror

جموں کشمیر پولیس نے جموں ڈویژن مانہہ دہشت گردی سنگ نمڑن غی خاطر دہشت گردی مخالف 19 خصوصی یونٹ قائم کیا ہیں۔ یوہ فیصلو جموں ڈویژن مانہہ حالیہ دناں مانہہ دہشت گردی غی بدھتی کا روئیاں غے پیش نظر کیو گیو ہے۔ اک سینئر عہدیدار نے جانکا ری دیتاں واں دسیو ہے جے قائم کیا گیا ان دہشت گردی مخالف یونٹاں غا ہر یونٹ غی قیا دت ڈی ایس پی کرے گو۔ جہیڑو مستقل طور ور اسی ضلع مانہہ قیام پزیر رہے گو۔ یہ دہشت گردی مخالف یونٹ روز مرہ گا امن و قانون غی صورتحال قائم کرھن غے نال نال دہشت گردی مخالف کا روئیاں مانہہ شامل وین گا۔ ان خصوصی ضلعان مانہہ ادھم پور، کٹھوعہ، ریا سی ڈوڈہ، کشتواڑ، رام بن، راجو ری تے پونچھ شامل کیا گیا ہیں۔

اس غے نال ہی خبراں غو یوہ بلیٹن ختم ہوؤ۔